

26/10/2003

Sultan Pahang minta rakyat kenang jasa PM

Sariha Mohd Ali

PEKAN: Sultan Pahang yang mengucapkan selamat bersara kepada Datuk Seri Dr

Mahathir Mohamad pada Jumaat depan, meminta rakyat tidak melupakan jasa dan pengorbanan besar yang dilakukan Perdana Menteri sepanjang mentadbir negara.

Sultan Pahang bertitah, antara usaha Perdana Menteri yang tidak boleh dilupakan ialah kejayaannya menangani kegawatan ekonomi pada 1997 dan 1998

serta keupayaannya mempertahankan Malaysia daripada dijajah kuasa asing.

Sultan Pahang juga yakin Timbalan Perdana Menteri, Datuk Seri Abdullah Ahmad Badawi, yang akan mengambil alih jawatan Perdana Menteri pada 31 Oktober ini, adalah tokoh paling layak dan sesuai bagi menggantikan Dr Mahathir.

"Kepada Perdana Menteri yang akan bersara 31 Oktober ini, beta mengambil

kesempatan mengucapkan selamat bersara. Pengorbanan dan jasa besar Dr Mahathir akan tetap diingati dan dikenang.

"Dr Mahathir sudah menamakan Abdullah sebagai penggantinya. Beta yakin,

Abdullah yang mempunyai pengalaman pentadbiran dan politik yang luas, mampu mengendalikan dan menguruskan negara ini dengan baik, dengan cara dan gayanya sendiri," titahnya.

Sultan Pahang bertitah demikian di majlis istiadat pengurniaan darjah kebesaran negeri Pahang, sempena ulang tahun keputeraan baginda yang ke-73, di Istana Abu Bakar, di sini semalam.

Hadir pada majlis itu, Sultanah Pahang, Tengku Mahkota Pahang, Tengku Puan Pahang, Tengku Muda Pahang, Cik Puan Muda Pahang, kerabat diraja, Menteri Besar, Datuk Seri Adnan Yaakob, menteri Kabinet, ahli Exco kerajaan negeri dan ketua jabatan.

Seramai 123 orang menerima darjah kebesaran negeri Pahang yang disampaikan Sultan Pahang.

Sultan Pahang bertitah, hubungan rapat dan kerjasama erat antara Kerajaan Persekutuan dan kerajaan negeri perlu berkekalan demi kesejahteraan rakyat keseluruhannya.

Sementara itu, Sultan Pahang meminta mereka yang menerima darjah kebesaran negeri ini supaya tidak bersikap sombong atau besar diri, sebaliknya perlu menjaga tingkah laku dan nama baik.

"Jangan mencacatkan darjat kebesaran yang dikurnia ini dengan melakukan

perkara yang boleh menjatuhkan maruah dan martabat diri serta memburukkan nama negeri Pahang.

"Beta mahu, mereka yang menerima darjah kebesaran ini menganggapnya sebagai pengiktirafan terhadap sumbangan yang dicurahkan untuk raja, negeri dan negara," titahnya.